

庸
閒
齋
筆
記

昔春秋於隱桓則書家父凡伯仍叔之子蓋皆大雅
舊人見故家遺俗猶存也孟子亦稱故國不在喬木
而在世臣三代以下如晉之王謝唐之崔盧皆以衣
冠舊族爲時所重求之我

朝若海甯陳氏其亦所謂名宗望姓鼎族高門者乎
余於陳氏識子莊太守蓋吾舅氏姚平泉先生之高
足弟子也出方雅之族兼文學政事之才同治初受
知於左季高相國疏薦於

朝筮仕吳中曾文正公及李少荃相國皆器重之歷

宰大縣所至有聲論者至比之陸清獻近年歸老於家泉石優游居多暇日乃娛情翰墨著庸閒齋筆記一書首述家門盛蹟先世軼事次及游宦見聞下逮詼諧遊戲之類斐然可觀昔宋范公偁爲仲淹元孫所撰過庭錄多述祖德閒及詩文襍事此書殆其流亞乎余勸付剞劂以廣其傳讀是書者當歎王氏青箱具有家學叢談瑣語亦見典型固與寒門素族殊也

同治十有三年太歲在甲戌陽月德清俞樾

序

同治壬申之秋解組歸來僑寓武林兵燹之後休養生聚又十年矣老成凋謝昔日知交存不十一族中耆長尤爲零落卽與余伯仲行者亦復寥寥歲月不居無怪吾衰之甚也端居多暇嘗舉吾宗舊事與兒輩言之恐其遺忘筆之簡牘俾免數典忘祖之誚殘冬未盡倏已成帙今年因公事滯跡吳門半載日長務閒追念平生舊聞及身所經歷目睹事有所記憶輒拉雜書之紛綸叢脞雖該諸鄙事無所不登而

國典朝章莊言至論異聞軼事軍情吏務及展卷所得者間亦存焉隱惡揚善事微諸實不敢爲荒唐謬悠之譚如碧雲毀瓊綴錄之誣詆名賢庶幾歐陽文忠歸田錄所言以唐李肇爲法而少異者不記人之過惡君子之用心當如是也合之前編共爲八卷約十萬言名之曰庸閒齋筆記聊以自娛亦可供友朋抵掌劇談之一助云爾同治十有二年歲在昭陽作璵斗指酉庸閒老人漫識于行葦堂時年六十有二

庸閒齋筆記卷一

海昌 陳其元 子莊

余家系出渤海高氏宋時以勛戚隨高宗南渡籍臨
安始祖東園公諱諒者明初居仁和之黃山遊學至
海甯困甚偶憩趙家橋上忽墜於水陳公明遇設豆
腐肆於橋側晝寢夢青龍蟠橋下驚起見一男子方
入水急援之詢知世族乃留之家公老無子止一女
因以女女之而以爲子焉東園公一傳爲月軒公諱
榮承外祖姓爲陳氏而世其腐業業腐者起必以戊

夜一日者於門隙見雙燈野外來潛出窺之則一儒衣冠者一道士也道士指公室旁一地曰此穴最吉葬之子孫位極人臣有一石八斗芝麻官數儒冠者曰以何爲驗曰以雞卵二枚坎其中明日此時雞子出矣乃於懷中取卵埋之而去次日公起磨腐忽憶前事往探其處則闐然二雞雛也正駭異間又見雙燈遙遙至雛已出壳不能埋急於室中取卵易之而屏息以伺二人者至搯之則仍卵也儒冠者咎其言不讐道士遲疑良久曰或氣運尙未至耶遂去不復

返居久之公乃奉東園公骨殖葬其中二世之後遂有登科者至今已三百年舉貢進士至二百數十人位宰相者三人官尙書侍郎巡撫布政使者十一人科第已十三世矣初葬時植檀樹一株於墓上堪輿家稱爲海甯陳氏檀樹墳

聖祖仁皇帝南巡時聞其異曾駐蹕觀焉

十世祖風山公諱中漸月軒公曾孫也爲諸生以春秋名其家性落拓喜周人之急所貸予常折券不責償市有持贖銀行哭甚哀公問知爲里僧所欺卽自

探懷中銀如數予之有丁氏鬻產既收價徒矣復據之公憐其貧爲更授價及割他產予之如此者三歲旱出穀三百斛賑饑者卽一鄉之人禱雨雨亦獨徧一鄉鄉人語曰天道不偶視陳叟其爲德類如此公歿後邑人請祠之鄉賢入祀之明日而芝生於祠之左楹明日又生三日又生其數七至九其廣六七寸至三四寸其色紫其狀若牡丹其香細縕若都梁雞舌然邑人觀之無不歎爲奇瑞乃署其樓曰紫芝吳人王穉登爲之記公二子長與郊以進士官至太常

寺少卿次卽余九世祖與相以進士官至貴州布政使孫祖苞官薊遼巡撫曾孫之遴官少保宏文院大學士是紫芝之祥也

少保素庵相國未第時以喪偶故薄遊蘇臺遇驟雨入徐氏園中避之凭欄觀魚久而假寐園主徐翁夜夢一龍臥欄上見之驚與夢合詢知爲中丞之子且孝廉也遂以女字之所謂湘蘋夫人是也夫人工詩詞精繪事嘗以從宦不獲供奉吳太夫人甘旨手畫大士像五千四十有八幅以祈姑壽世爭寶貴

聖祖曾取入內廷寵以

御題尤爲閨閣中榮事東園公暨公皆以外舅夢龍得偶一則貴於子孫一則貴於其身龍亦靈怪矣哉六世從祖文簡公生而岐嶷三四歲時每於睡夢中一聞梵唄聲必驚起合掌趺坐母夫人知其有自來也撫之曰兒旣生我家當從事聖賢之學此佛氏之教不足循也公嘗聽已卽臥從此聞經唄聲不復作矣比長博極羣書以貢入成均旋中京兆試文名藉甚上達

宸聰已未科會試適婦翁長洲宋文恪公充總裁官
公以嫌不與試是日

聖祖臨朝閱禮部奏迴避事指公名以詢廷臣羣臣
以宋係陳婦翁對

上曰翁婿何迴避之有可趣令入試時日已屆亭午
闈中將放飯矣忽傳鼓啓門奉

旨特送舉人陳元龍一名進場然公仍以嫌被屏乙
丑科會試中式總裁以十卷進呈公卷列第十

上拔置第二

殿試

上復親擢爲一甲二人賜進士及第非常

曠典爲從古所未有也

文簡公旣入翰林

聖眷優渥屢從屬車豹尾卷阿矢音之作一時稱盛
會都御史郭琇劾高文恪公士奇指公爲交結有叔
姪之稱得旨一并休致公奏辨謂臣宗本出自高譜
牒炳然若果臣交結士奇何以士奇反稱臣爲叔事
遂得白再擢掌院學士吏部侍郎巡撫廣西人皆賀

之宋夫人獨愀然不悅者累日曰一門羣從咸列清
華我夫子乃出爲粗官令我慙顏於娣姒矣事載全
太史祖望文集中所撰廣陵相公傷逝記時弟兄叔
姪中清恪公爲春卿文和公爲冬卿丙齋公爲司寇
苑廬公亦貳宗伯夫人之姊妹夫太倉王相國揆方
掌鈞軸海甯顧侍郎合肥李宮詹長洲繆宮贊同在
朝列故夫人云然然不數年亦入總西臺
世宗即位授公宰輔之任矣

清恪公諱詵精堪輿之術撫貴州日猺獞屢竊發爲

愚公周覽其城郭曰陰陽向背均失其宜禍害所由
來也遂奏請築而更之既成曰從此百年可無兵燹
至道光末年賊始蠢動距築城時已百五十年矣公
嘗於海甯相得一地以重值購之而不用暮年官禮
卿在京邸次子卒於籍家人求葬地查夫人以所購
地與之公聞之愬遽請告歸歸而諸宗戚迎之公不
還家先詣宗祠於祖父無爲公神主下取一函示宗
戚啓之則內書一行曰某年月日時改葬無爲公於
某處卽所葬次子之地也公愀然曰余半生涉歷乃

得此地地之吉與檀樹墳等不敢自私而留以葬吾
祖思與伯叔弟兄共之今乃以葬吾子負初意矣然
年月日時皆未至恐不能善則又詣葬處視之頓足
曰葬師無識偏左丈許壞此佳城可爲惋惜因指其
旁一大樹令掘之掘下三尺得石匣中有書曰某年
月日時葬無爲公於此公因歎家門祚薄不能得此
吉壤衆曰何不再移葬之曰地氣已洩不可用矣衆
曰然則此地遂無用乎曰後六七年子孫當有武
官至一品者至嘉慶初元公會孫體齋公用敷官安

徽巡撫兼提督授一品封爲振威將軍

公左足下有赤痣每自詡爲貴徵黃夫人者公配查夫人之侍婢也嘗爲公濯足手捧足而視其痣公笑曰婢子何知我所以官極品者此痣之相也夫人亦笑曰公欺我公足祇一痣已貴爲公卿何以我兩足心均有赤痣而爲婢女公聞之驚使跣而視之信遂納爲造室生二子長文勤公世倌官宰相次闇齋公世侃官翰林查夫人亦生三子皆登科第廌仕世目公門爲五子登科云

文勤公年少登科敏歷中外垂六十年年八十始得請

予告歷掌文衡門生故吏徧天下相

高宗者十七年福壽近世罕比生平崇節儉講理學每敷奏及民間水旱疾苦必反覆具陳或繼以泣

上輒霽顏聽之必笑曰汝又來爲百姓哭矣事載洪太史亮吉東生集中然秉賦甚薄每日飯不過一甌或啜運實少許卽可度一日而年躋大耋信壽算不在飲食之多寡也都中嘗有一瞽者善揣骨相公與

唐史文靖相國屏車騎往訪之警者揣文靖未半
卽跪而呼曰中堂泊揣公則曰此乞丐也文靖呵之
曰此陳中堂警者揣之良久又抱其身搖之愕曰眞
乞丐也烏得欺我公笑曰大約以我無食祿之故耶
乾隆第六次

南巡公已歿矣時

諭祭歷代名臣自周公以下止三十餘處

特命以公及文簡公列入尤異數也

歷朝官制不同然一朝之中亦復前後互異我

朝凡一甲一名及第者均授職翰林院修撰故有殿
撰之稱而六世從祖丙齋公司寇則曾官翰林院修
撰兼左春坊左諭德司寇諱論以三甲進士由庶吉
士授檢討遷此職故吾家雖無狀元而有修撰

報施輪迴之說豈盡無憑哉先大父毅堂公嘗爲子
孫言高祖塋南公諱鑣官雲南首府時總督某公貪
暴無藝稍忤意旨卽加以白簡諸官奉令惟謹一日
者飭雲南守購赤金二百兩公承命向肆中買金每
金兩十六換資金開價投入總督大怒不受自是指

癥索垢呵責萬端公擬卽挂冠矣會總督爲言官列款糾劾

天子命諸城劉文正相國來按是獄公上謁相國以首府必總督私人拒勿見而使緹騎圍督署搜索得通賄簿某若干某若干錙銖無漏而於雲南守名下則大書曰某日送赤金二百兩索價十六換發還等字遂大重公總督拘於請室昔時趨附輩無一人過問者公乃爲之納橐餗供衣履比奉

命鎖挈進京又餽白金千資其行總督大感愧搶首

於地曰某無眼不識君此行若得生必矢報儻男不赦來世爲子孫以報君比入都則

賜自盡越十餘年公以養親歸里久忘前事矣一日者坐書室假寐忽傳言某總督來方起迎之總督已至前珊瑚冠蟒玉如故狀向公跪曰來報恩欲掖之已直走入內室驚而醒正疑訝問則報生第四孫矣卽先大父也彌月後乳嫗抱之出見公卽莞然笑公撫其首曰兒他日不患不作官但不可再貪耳卽噉然哭先大父自言平生蒞官行法膽極大獨一見貨

財則此心惕惕然懼其懲於前世之夙根耶粵南公
晚居石門見近隣二童子奇其貌招之來家俾與先
大父共讀卽陳學士萬青侍郎萬全也故名大父曰
萬森

聖祖朝有以諸生獻賦而得

賜二品服者世以爲榮後來久無此

曠典矣先大父於乾隆五十九年在天津以大臣子

弟迎鑾蒙

賜御書貂皮朝珠等件次日詣

宮門謝

恩適

上御樓望見指先大父問曰此人何以獨不掛珠軍
機大臣以諸生未曾授職對

上曰朕所賜也趣命之服次日復掛珠赴

宮門謝

恩先大父嘗言未登仕版時金頂朝珠誇爲

異數比厯官牧守反無此榮耀矣其時先叔祖晴巖
編修以諸生獻頌

賜大緞二端越十二年乃入翰林

先大父嘗言少時讀論語每不服孔子及其老也戒之在得二語謂人老則一切皆淡何須戒得比官滁州時年逾六十矣有獄事以萬金餽者已峻拒之去向者每睡就枕卽酣臥是夜忽輾轉不寐初亦不解已乃自批其頰罵曰陳某何不長進若此遂熟睡如初旦語人曰我乃今始服聖人之言也

先大父居官清謹自持道光元年攝泗州事州地處下游每年夏秋之間城外半成澤國例請賑卹然當

賑卹之地民皆轉徙無可稽核悉以虛冊報銷故皖省有南漕北賑之謠公獨不肯辦觸怒上官幾致參劾遂解州事人皆以爲愚公但笑應之而已嘗謂余兄弟曰我雖不得此錢以清白吏子孫五字貽爾等不亦厚歟此事通州白小山尙書載入公墓志中前年余代理新陽縣事吏胥有請少報熟田多徵米者余曰祖不喫賑孫顧喫荒可乎一笑謝之

不爲良相卽爲良醫醫仁術也儒門事親一書且以能醫爲人子事矣然余家則有以醫致累者曾祖恬

齋公侍母直太恭人疾口繙閱藥書至抱書臥中夜
有省遂工醫官四川及長蘆時兩次奉

命馳驛入京暨熱河視裘司空福額駙疾蓋以二公
上奏云臣疾非陳善繼不能生之故都中有陳神仙
之名洎補天津縣知縣

上謂方制府以官爲酬醫之具加責讓焉曾叔祖宛
青公諱漢精繪事亦善醫官禮部時和相國珣召之
令視疾公咨於座主韓城王文端相國相國曰此奸
臣爾去必以藥殺之否則後不必見我公遂謝不往

和啣之時已保送御史矣乃出爲鞏昌知府繼又以失紅本事貶官知州

君相能造物然其間有幸有不幸者文簡公際遇

聖祖可謂千載一時至嘉慶年間叔祖晴巖公以戊辰進士官翰林院編修公本浙西青宿文章名海內仁宗嘗問富陽董文恭相國曰東南世家子弟在朝列有文學者朕欲拔一人用之文恭卽以公名對且備舉其行誼會大考翰詹

仁宗閱其卷諭文恭曰陳傳經寫作俱佳已置一等

第一矣文恭告公私爲慶幸比榜出公名在三等大
惑不解越數日

仁宗又諭文恭曰曩本置陳傳經第一不知何時將
其卷夾入三等中惋惜久之文恭又告公以爲此後
必且大用而公遽病卒公生平最不佞佛臨終乃自
言前世是少室僧卒後無子有門生入室爲尼置喪
事恍惚見公僧服危坐亦奇矣哉公與文簡公皆似
高僧再世而遇不遇則各不相同此其中真有幸有
不幸

太常公隅園在海甯城內

本朝

聖祖

高宗六飛南幸駐蹕於是園

賜名曰安瀾於是海甯陳氏安瀾園名天下今遭粵
匪之亂已成荒煙蔓草矣嘉慶年竹崖伯祖文駿以
長蘆鹽運使道光年梅亭叔祖崇禮以四川建昌道
召見

仁宗

宣宗垂詢家世均問及是園

宣宗最重科目而梅亭公以佐貳起家心頗自危迫
陳奏及清恪支勤二公

上莞然曰汝固海甯陳家也遂擢都轉旋卽秉臬開
藩道光時以佐貳蒙

簡用者止公一人固緣公之才亦由祖宗世德庇廕
也

明王洪洲參政圻家訓曰子孫才分有限無如之何
然不可不使讀書貧則訓蒙以給衣食但書種不絕

可矣若能布衣草履足迹不至城市大是佳事關中村落有鄭魏公莊諸孫皆爲農張浮邱過之題詩曰兒童不識字耕鑿魏公莊夫仕宦豈能常哉不仕則農業可安也不可以近於衣食爲市井衡門之事先大夫嘗言服官福建二十餘年家居又二十餘年歷數州縣同官之子孫能卓然自立功名逾前人者百中僅一二人能循謹自守不墜家聲者十中僅一二

人豈州縣官之子孫皆坐而不肖哉飲食衣服貨財先有以泊其志氣卽不驕淫縱欲此身已養成無用

之身一旦失勢歸田無一技之能無一事可做坐致
貧困一也況居於衙署之中有淫朋以誘之有狡僕
以媚之圈套萬端不中不止自非有定識定力者鮮
不爲其所惑二也而爲州縣之父兄方且營心於刑
名錢穀事上接下之道無暇約束子弟子弟卽不肖
亦無人肯聲言於父兄之前故有身雖在宦途而家
計已敗壞不可收拾者歷舉數人數事爲之太息痛
恨而已余兄弟幼時卽聞此論幸稍長卽歸家讀書
未沾染此等習氣亦未遇此等牢籠先皆以訓蒙爲

事嗣名譽略起亦不過就記室之席刻苦甚於寒士
故能稍稍自奮然不幸自身復作州縣五六年來時
時以先大夫之言爲戒第不知己之子弟又何如矣
余家自高祖勇南公以內閣中書迴避出爲縣令曾
祖祖父及余身皆官州縣已五世矣綿延不絕是由
先人謹慎刻厲有以維之思之可幸尤可懼也
梁吉玠上書救父古今豔稱之吾宗於

本朝得二人焉一爲六世從祖文和公鼓永父定菴
公以兄少保公謫塞外與於徙公上書訟寃格於吏

議遂漉血草疏願代父行有緹縈以一女子尚能救父臣荷

聖朝孝治敢惜微軀之語雖不得請然

世祖憐其孝次年卽得釋歸國人稱爲至誠所感

聖祖御極公以孝行蒙

宸眷累擢官至工部尙書一爲質庵叔祖容禮以父
英德令沁齋公謫戍伊犁遂棄妻子隨侍以往跬步
不離者十餘載嘗密請於將軍松文清公願以身代
俾父得生入玉門公憐其誠據情入奏雖亦未奉

俞旨而孝子名布於域外矣父歿徒跣萬里扶柩歸
葬廬墓三年後官江蘇通守松文清公入掌鈞軸書
聯贈之曰攬勝寰中九萬里承懽塞外十三年蓋紀
實也

余家玉煙堂及渤海藏真等帖十餘種皆九世從祖
贈兵部增城公所刻董文敏公其昌未遇時館增城
公家者頗久故文敏公書吾家最多所書法華經小
楷帖尤精絕文敏貴後嘗以鍾紹京靈飛經真蹟質
金八百已而贖還旣復以質則不再贖矣帖後附文

月清列傳卷一
敏質帖贖帖書二通乾隆乙酉

六飛駐蹕安瀾園曾以進

呈奉

純廟御批有永爲陳氏傳家之寶等字不知此帖何時落於嘉善謝氏今聞又歸常熟翁氏矣文敏當日見寶時抽去十二行一頁不審此頁今亦歸翁氏否吾家所刻渤海藏真中少此一頁也庚辛之亂碑石爲賊取以築城賊平後搜討僅有存者今合諸帖爲一幀更名煙海餘珍云

余家以工書稱者頗多香泉太守及匏廬宗伯最有名太守少時夢登一樓滿貯隄廩有神人謂之曰供予一生揮灑自是書法日進以歲貢生受

聖祖特達知入直

內廷雍正十一年

世宗敕以公書勒石爲夢墨樓帖十卷

高宗愛其書與張氏天瓶汪氏時晴鼎峙焉事紀余翰林秋室集跋語中乾嘉以來四海爭購公書日本國王尤嗜之海舶載往輒得重值致故鄉幾無遺墨

余所藏公草書庾子山春賦十二幅一時無對辛未冬張子青制府來上海閱機器余以制府爲今代書家懸之行館用供賞鑑有侯補道某公見之謂是惡札何可溷制府遽令撤去人皆以公負書名百年忽遭此厄爲笑壬申冬余謁制府談及公書制府亦有珍藏者余述某觀察語制府亦大笑公政事卓絕山西貴州江西皆祀名宦而循聲乃爲書名所掩公平時每夢至一處園亭山石極幽雅之致墻外有寺有塔心甚樂之如是者有年比守南安衙齋正如夢境

遂卒於官抱廬宗伯爲香泉太守之姪康熙癸未與
弟文勤相國同入翰林

聖祖臨朝舉手謂文簡公曰大喜汝家又添二翰林
矣公免冠謝舉朝榮之入直

南書房書法特荷

溫旨褒嘉

純廟御極命繕寫

御製詩

內府書籍

月開卷三
祕殿珍藏悉俾筦鑰游歷春卿數年之間扈從凡二十七次

寵遇之隆一時無兩居家撰著不下百數十種奉

敕所成者有歷朝題畫詩全唐文宋史補遺謚法考諸書行草出入二王而得香光神髓卽顏歐虞褚及宋四家無不研究遇真蹟必撥冗仿寫無間寒暑書名傾動寰宇夸酋土司金潯王嶢咸欲邀公尺幅以爲家寶南中膺手不下數百輩公聞之略不計也然公之文學亦竟爲書法所掩余在上海購得公所臨

靈飛經一冊張子青制府嘆爲精絕爲之題跋擬以入石尙未果也

乾嘉之際天下書家推北孔南梁梁卽山舟學士壽最高故書最多自經兵燹亦漸零落矣學士暮年書尤嫵媚此爲壽徵嘗言

本朝人不以書名而其書必傳者一爲陳文簡公一爲陳句山太僕語載梁紹壬孝廉秋雨盒筆記中太僕以文章著公以經綸顯皆掩其書名

浙江之大患莫若海塘厯朝修築糜帑金至千百萬

至今日而尤亟矣六世從祖宋齋公生於海甯居於海鹽於海塘情形最爲熟悉嘗爲兩邑之近海隅同被海患同而修法則各不同甯邑海在南面離山旣遠塘外沙時坍漲潮自東而西不慮其平滿而慮其方來潮頭雖高而急水必從沙底滾刷沙愈去則水愈近塘而塘難保矣古人修海甯塘設立排椿木櫃之法蓋用排椿以護沙用木櫃以護排椿皆於塘外着力使沙日積而水漸遠迨潮至平滿齊塘强弩之末不穿魯縞所以甯邑海塘只用條石不須過於長

厚惟審其捍禦之道全在塘外也鹽邑海在東面離山甚近塘外沙不埤漲潮自下而高不慮其排決而慮其衝吸石縫稍疏則內土必隨潮滾出土愈去則石無所附而塘亦危矣古人築海鹽塘設立縱橫疊砌之法蓋石大則負重難撼水曲則勢緩易當要於塘身着力使土日固而塘可久倘石有欹斜墊塚千金之堤潰於蟻穴所以鹽邑海塘不用小石必須極其長厚惟審察捍禦之道全在塘身也甯邑海塘莫患於潮頭逼塘入手毫無阻攔塘外日深難於措手

鹽邑海塘莫患於潮頭頂衝修築務期堅固餘外次衝便易着力至於大風沓潮名爲海嘯又有非人力所能捍禦然古人慮之深矣故甯邑海塘內有六十里塘河鹽邑海塘內有白洋河旣以取土培塘可使上塘常加堅厚又以各路分消不使海水灌入田畝此則海塘善後之策也公關心桑梓於海塘一事講究不遺餘力當時治海塘諸公咸稱公之經濟能得古人因地制宜之意奉爲圭臬故雍乾以來數十年浙西無海患者以此也公諱訐字言揚別號宋齋曾

官温州府學教授年八十時第三子存齋公世倅以河南按察使兼署布政使入

覲蒙

世宗垂詢公年齒履歷

御書松栢堂匾額并人參貂皮甯絢等物以賜公并諭爾父有德有壽給他老人家歡喜欽此公因自號歡喜老人以志

恩遇云

吾家得道學之傳者爲七世祖簡齋公及六世從祖

乾初先生簡齋公從學漳浦黃石齋山陰劉念臺兩先生之門稱高足弟子嘗論學在天地有宗有翼宗之者一人翼之者數十人所謂疏附後先也堯舜去人其間亦邇禹皋伊萊望散亦止略舉以例其餘顏曾既往董韓未興孟子以一身任仲尼之道之重有宗無翼所謂軻死而不得其傳者已於篇末無有兩嘆寓之孟子之憂患深矣有宋絕學旣明至考亭而集成門徒甚盛史不勝書迄於元明之際許姚趙竇洛學行於北金吳虞許閩學彰於南以逮柳黃吳宋

之徒莫不推究精微張皇六藝卒開三百年文明之治可不謂有宗有翼之極盛者歟前明學脈莫盛姚江翼之者爲江右爲淮南爲東越雖復功咎叢生末流雜還然而弊之所生救之所始也剝之寢微復之寢昌也吾學未嘗一日絕也余攝齊載山漳浦兩先生之門原本考亭追溯之濂溪二程以達於孔孟而一時門徒未見有董裳黃幹之儔者何其寥寥歟公爲此言意蓋自任也至其深造自得傾折前賢絕不標奇樹幟可以想見論學非其人勿輕談止談詩文

卽詩文亦不輕作或問之曰以先生之學而爲詩文
必傳無疑也公不之應吳志伊作十國春秋公曰古
人著書以爲法戒十國春秋人物乘時盜竊皆出下
中何庸追述其行事乎嘗言侯朝宗王於一二子文
之佳者尙不出小說伎倆其評隲古今不肯隨聲附
和如此與姚江黃徵君宗義同出蕺山之門徵君曾
爲公作傳極推重之公以拔貢入成均終身不仕歿
祀鄉賢乾初先生明末舉茂才廩於庠遭喪亂敝屣
棄之窮居海濱不改其樂早年論學於諸儒中最喜

姚江知行合一之說謂可與孟子道性善同功後與祝淵孝廉遊葢山先生門奉慎獨之教躬行實踐重規疊矩旣而祝殉難以節顯先生則巋然以德望重一鄉國變後杜門息影足不及中庭者二十年君子謂不異袁閔之士室也其初所作詩文清真大雅寄托深遠書法直逼鍾王撫琴吹簫時奏於山巔水涯篆刻博奕諸好無不工自奉教葢山後一切陶寫性情之技視爲害道而屏絕之社集講會以爲無益身心亦婉辭不赴所著有大學辨禪障性解學譜葬論

喪俗家約諸書其餘雜著不下數十萬言皆藏於家
居母喪手寫孝經百餘冊以志痛戚友爭寶藏之簡
齋公諱之問乾初先生諱確

吾家以詩書爲世澤自有明中葉承陳姓之後代有
聞人人各有集見於秀水錢警石廣文所纂海昌備
志所採者不下萬卷焉其尤以淹貫名者爲曾叔祖
會理州知州摩村公諱鋤堂伯孝廉方正仲魚公諱
鱣摩村公弱冠卽擅文名乾隆中楊大司馬薦舉博
學宏詞著作等身晚年與金宗伯柱錢方伯嶼沙江

徵君槐塘姚比部羽峰倣洛社之會龐眉鳩杖花晨
月夕載酒湖山留題殆遍觀者目爲神仙中人仲魚
公賦性穎異讀書過目成誦嘉慶丙辰詔天下督撫
學臣舉孝廉方正時學使者儀徵阮文達公以公名
應舉并手摹漢隸孝廉二字以顏其居復爲書士鄉
堂額以贈旋登戊午賢書六上春官後遂不復作出
山計歸築講舍於紫薇山麓寢處其中一以著書爲
事生平一無所好獨於古名人書畫不惜重價購之
所心賞者鈐以二章一肖已像上題仲魚圖像四字

一綴以十二字曰得此書費辛苦後之人其鑒我其志趣如此所藏書最富惜兵燹之後皆散佚矣

香泉太守以書名天下初不知其能畫也同治癸酉在蘇州妹丈唐蕉庵司馬以公所畫花卉草蟲手卷見示驚嘆精絕乃知才人固無所不能余嘗嘆公政事爲書法所掩今又嘆畫爲字掩也至吾家以畫著者愚亭侍讀以文學與修

國史而遊情繪事工設色花鳥人爭寶貴至宛青太守則兼以山水擅名官禮部時質邵王以文墨奔走

天下士嘗因疾延公於邸出素箋曰聞先生山水名家肯爲我作小景以當枚乘七發乎評公畫爲在粗文細沈之間都下卒無其偶其欽重如此公又爲河間紀文達相國作優鉢曇花圖於曲臺至今藝林傳爲佳話云

余家自有明中葉山高氏而承陳姓迄今三百餘年至嘉道之間子姓日益繁衍咸豐後經粵匪之亂溝壑之轉四方之散第宅焚毀老成凋謝宗族稍零替矣迴溯此三百年間傳世已將二十人才輩出在浙

江推爲望族道光年間

宣宗成皇帝猶有海甯陳家之諭則族望固久著矣然特衍高氏之一派耳計自明正德以來吾家登進士第者三十一人榜眼及第者二人舉人一百有三
人恩拔副歲優貢生七十四人徵召者十一人庠生及貢監生幾及千人宰相三人尙書侍郎巡撫藩臬十三人京官卿寺外官道府以下名登仕版者逾三百人祀名宦者十一人祀鄉賢者八人祀昭忠者五人

國史有傳者十三人其郡縣志之載名臣循吏文苑
義行者未易屈指數而寄籍廣東河南山東等省三
十年來聞多有登科第列仕版者因譜牒未修尙不
能考至由陳氏復出嗣他姓者如仁和之張雲璈河
南之司馬或科第累世或官至督撫嘉慶年間有東
河總督司馬騷
皆因乾隆年間修譜時漏列至道光時再修則已無
從考証今張氏司馬氏子孫相遇尙稱族誼而輩行
則未能考亦爲歉事惟高氏則自有譜自宋武烈王
以下世次炳然可序故相值能舉輩數聯伯叔兄弟

之誼焉夫吾宗渤海陳氏祇臨安高氏一支耳而自明以至

本朝子姓繩繩振振若此罔非

天恩祖德所留貽今雖遭亂而少衰然爲子孫者生聚教訓可不亟思自奮以迪前人光也哉

文勤公自幼聞論性命之旨輒形嚮往潛心洛閩之書旁及陸王辨其同異得失嘗輯學古錄以備考鑒釐爲六類書高二尺輯建中錄以資政治凡三十二卷他如仁愛叢說教習郭言學辨質疑讀書管見與

友朋言學及門問答之語以及詩文雜著凡已刻未刻共二百餘冊兵燹之後家鄉已自無存不知曲阜一支尙有存焉者否余在青浦得公蒙

恩予告紀

恩及留別同朝詩十六首茲附錄之以見威鳳之一羽云乾隆二十三年二月三十日奉

上諭大學士陳世倌老成端謹學行兼優簡任綸扉勤勞夙著昨以年老懇請致仕朕已允其所請令於春融從容就道並加太子太傅以示褒嘉茲當陛辭

倍深眷念既賦詩一章以寵其行着頒賞筵宴於賜
第令部院堂官往餞賜帑金五千兩爲路費馳驛回
籍仍按原品在家食俸俾資頤養起程時着在京官員
祖送歸途所過地方其有司在二十里以內者俱着
送迎旋里之後巡撫兩司時加存問俟家居一二年
自行酌量精力尙健仍可來京供職用昭優眷老臣
至意欽此

臣

跪讀之下伏地慚惶感泣叩

恩恭紀四首

麗藻高懸列宿寒

宸章捧出五雲端九天韻入鐘鐃響一字榮同華袞
看夙夜祇慚臣職負江湖難忘

主恩寬淋漓

聖製懸星日渥澤常依墨海潤

特勅堯厨出尙方

九重祖帳拜

恩光愧嘗全鼎鹽梅味喜浥黃封雨露香玉膳瓊尊
來

賜第鵷班仙侶話歸航東都門外分攜處車騎還看

溢道旁

綸扉竊祿廁班聯老去長慚疏傳賢歸棹更邀

天府賜投簪仍給

大官錢素絲自守青瑣舊黃髮仍娛白社年

聖主施恩皆格外匪頒直許到林泉

陛辭感激泣痕垂春水抽帆去路遲乘傳共看飛彩

鶴呼嵩還願拜

彤墀郊迎不計郵程遠存問先邀

天語慈嬴得都人傳盛事衡門歸老太平時

乾隆丁丑嘉平月蒙

恩予告歸里回憶

歷朝受知之深兼

允微臣

遂初之志涓埃未報慚感交并敬賦長律六

首

早年占籍到蓬瀛侍從

三朝見太平綵筆湯誇鸞掖貴冰銜愧列玉堂清春

隨

翠輦花飛岸

聖祖仁皇帝南巡

康熙丁亥正月隨從

秋度榆關

月照營

自丁亥至辛卯先臣出撫黔楚每秋
彌禮成奉命出塞代請

聖安

認得巢

痕親切地觚棱入夢涕縱橫

秋高深院鎖簾櫳文榜曾觀列國風鑑別每愁魚目
混搜羅敢信馬羣空

聖朝不棄葑菲體臣節惟持清白衷

天語品題誠竊忝愧將凡質比宗工

世宗憲皇帝以

世倅聲

名比之李文貞張文

端遂擢侍講學士

戢影衡門服乍除忽膺節鉞走輶車河山十二雄東
土禮樂三千近

聖居差喜壁經尋舊迹未成府海著新書自知迂拙
曾何補削籍歸來好荷鋤

天心寬大沛新綸宥過何期及小臣乍許鳴騶趨柏
府旋邀轉漕出

楓宸百寮敢誦持綱紀五禮甯堪重縉紳更領冬官
邦土職河渠三策讓前人

世信曾上三劄
子言河務事

宣麻黃紙

禁中傳政府俄登染

御煙卿月驟遷聯兩部

自憲副至入相僅歷戶工二
部遷除之速素所未有實叨

異江鄉歸住只三年
戊辰冬落職家居辛未春
聖駕南巡復蒙起用

賡颺竊附

明良會獻納難酬雨露邊

聖主當陽全盛日長同擊壤樂

堯天

君恩浩蕩卬山重臣病侵尋歲月催拜表幾行含淚
入

御批一道帶春來獨蒙

溫語憐烏鳥

疏內有修葺先塋之語特蒙
恩諭及之
更進

崇階勵駑駘歸載

寵光誇父老桑榆晚景荷

栽培

戊寅仲春將出都門留別

同朝六首

追陪

紫殿愧齊肩心佩儀型十七年燕國文章推巨手郭
侯風度儼神仙東華並馬趨鈴閣西苑連茵侍

御筵齒序同朝慚最長台先諸老賦歸田

留別省中
諸閣老

層霄斗極

九天臨履跡衣香在

禁林時論共推霖雨望諸公須極歲寒心每懷補職
成虛願愛聽嘉謨久好音豈忘江湖辭

魏闕羞將白髮玷華簪

留別九列
諸公

著作聲華重

帝廷難忘風月是頭廳

九重載筆題仙籍幾輩乘槎識使星
視草蓬池春爛漫校書藜閣夜青熒
儒生結習心猶在欲籍餘年老

一經

留別翰林諸先生

上苑花開聽鳳鳴南司車過避馳行漫持丹筆來先

後

余以副憲總憲兩入西臺

每伏青蒲憶父兄

余家父叔兄弟官執法者五人居臺

諫者六人

已看霜容同鐵冷仍期笑口比河清竹埤梧掖

榮歸夢最愛臺垣有直聲

留別臺省諸先生

鐵網頻張學海濶祇憑虔惕寸心丹由來科目人爭

重卽語文章報亦難共勵松筠堅晚節獨慚桃李屬

春官昇平努力期公等老眼還將拂拭看

留別應試諸君子

來往長安六十年

余於丁丑歲暮隨入都距今出都恰六十年

先君子

不辭

青鬢換華顛衣冠會比粉榆社

輦轂花明玳瑁筵

兩浙海南各有會館每歲正月宴集同人

入耳纏綿鄉

語熟登堂几杖典型傳

館內有三賢祠春秋兩祀以報先德

春明門外

柴車路梓里情牽倍黯然

留別同里諸親族

庸閒齋筆記卷二

海昌 陳其元 子莊

吳少村中丞昌壽少負奇氣踔厲風發魁碩類武夫與余居相距不里許晨夕過從相與角藝論文聞有不合必反覆爭辯時或攘臂大呼驚動鄰里遇契合相賞處又復爲之叫絕當鴛湖書院課時每與沈西卿筆山昆季及余釀錢數百文至酒肆飲噉杯盤狼籍必罄盡以爲樂如是者有年道光甲辰余銓金華校官少村亦成進士以知縣分發廣東自是不相見

矣有人自粵中來者傳其政聲卓然有吳青天之號
比擢撫河南時百姓號哭罷市製萬民傘相送至干
有餘柄卽乞丐亦爲製傘好官之名滿天下然余懶
於作書二十餘年不甚通音問同治丁卯余以州牧
提調松滬釐局適少村奉廣西巡撫之

命來上海附輪舟赴粵是日余在寓中僮僕皆他出
忽聞庖人於門外若與人斷斷然呼之問故則曰有
一類武官者衣服弊陋欲來求見向索手本名帖又
復無有但言與官是幾十年前好朋友而不肯道姓

名余急令延入其人出曰官喚汝遂引之從側門入則少村也相見大喜少村謂余曰足有風疾請長揖不拜可乎余戲之曰豈有令中丞公叩首之禮少村笑曰呼之入走角門豈有不行叩首之禮者遂彼此大笑曰本欲卽行登舟因知君在此故特走訪帶來三僕方打疊行李不令隨行而忘持拜帖乃致此窘又笑曰卽攜拜帖而廣西巡撫手本亦未具也遂縱譚良久余問其在廣東何以得民如此曰無他伎倆惟實心任事不要錢耳別去之際相訂年逾六十卽

歸里同作洛社之會乃抵粵未半載遽爾騎箕

國家失此寶臣朝野惜之相傳少村歿後其幕友紹興俞君方家居正欲午餐忽捨箸起立若爲接物者繼又作拆信之狀戚然曰吳中丞書也中丞以任所公事殷煩仍邀我前往襄理然昔在南方帆檣甚便今北路非車馬不可此非我所習奈何其家人曰聞吳中丞歿矣安得來請曰中丞今已爲冥官家人曰何不辭之曰不能也曰盍禱於城隍神請其代辭乎曰渠官甚尊非城隍所能企及然我往須得某厨侍

我耳是夕俞君卒次日某尉亦無疾卒嗚呼如少村之爲人倘所謂生爲上柱國死作閻羅王者非耶越五年復有余親家錢慎庵一事

慎庵名德承浙之山陰人居心仁恕律身廉謹胸中肫然粹然不設城府以簿尉起家歷官州縣所至有惠政同治二年今相國李肅毅伯方撫吳中以循良薦舉

特旨擢知府數年間署松江常州蘇州江甯鎮江府事賢聲噪一時辛未三月由鎮江得代來蘇臥病邠

舍時余自新陽調攝上海以邑太繁劇意不欲往愼庵顧以大義相勸蓋愼庵之季女乃余長子婦也五月余將赴上海任愼庵以病劇歸里六月愼庵卒七月兒子至紹弔喪還縷述其臨歿情形余爲之驚歎不已初愼庵以疾甚歸歸後疾日以平第精神疲乏未能出戶耳六月初旬晨起謂眷屬曰帝命我作總管神有差官四人來迎赴任可速具筵款之家人聞之疑信者半乃設羹飯祀之大門外大門距內室遠愼庵室中忽怒曰四人皆官遠來接我奈何待以野

鬼之禮促向中堂設席以享乃可衆懼從之祭訖屈指計曰二十日太促二十二日辰時可矣越一日又言山會二縣城隍神爲之餞行待以上官之禮辭之不得云云自是十餘日舉動如常亦無病狀至二十二日向辰呼諸子令催合家眷口齊至榻前訣別諸子惶遽以爲疾作將呼醫則搥牀怒曰我且死豈醫者所能活乎比家人齊集舉目周視一過泊然而逝與半月前所剋之期絲毫不爽於是蘇人曰錢公作我郡城隍矣常人亦曰錢公作我郡城隍矣今松江

常州二府思其舊德皆呈請祠名宦焉先大夫嘗言
閩中同官言可樵司馬朝鑣臨歿自書一聯云始笑
生前徒自苦耳既知去處亦復陶然以爲去來自如
嗚呼若慎庵之自定死日可不謂之去來自如耶

太倉顧伊人撰吳梅村先生行狀云康熙辛亥正月
旦先生夢至一公府主者王侯冠服降階迎揖出片
紙非世間文字不可識謂先生曰此位屬公矣十二
月朔復夢數人來迎先生書期日示之故豫知時日
竟不爽王文簡公池北偶談亦載其事并記有浙僧

水月者能前知先生疾革拏舟往詢僧曰元旦夢告之矣何必問老僧吳人相傳先生作閻羅王云余六世從祖諱容永字直方先生之壻也順治甲午舉人考選知縣卒年僅二十有九幼時爲冥官每夜赴陰府治事嘗思罪何以杖重於笞斬重於絞於是皆以身試之忽奉上帝命曰陳某心存愛人特予晉秩於是金冠象簡自稱小聖與岳瀆大神無異與閩汀黎媿曾甲午同年嘗謂媿曾曰余知四世事初爲蜀通判子苦嫡母嚴商於外母死乃得歸再世爲王孫三

世爲京師竹林寺僧一日放參有婦女羣過偶一目之遂墮落至此八歲時從家大人入寺一見恍然齋房徑路皆爲記識今雖爲宰相子後世愈下矣事載徐季方見聞錄梅村集中寄懷陳直方有百口風波大三生夢寐眞膏梁虛早歲辛苦得前身之句蓋指其事也又伯祖惺齋公諱觀國乾隆乙未科進士厯知江蘇金山蕭縣婁縣甘泉高郵州升海門同知海門之設學額自公詳請奏定所蒞之處均循聲卓著在海門得疾自言當作甘泉縣城隍卒之夕衙署前

百姓均見甘泉縣城隍燈籠大小數百充塞街巷而公奄逝矣因記少村愼庵爲神事故並書之

鐵嶺楊杲樓先生書續先大夫嘉慶癸亥同年也先大夫官福建先生官浙江之青村場鹽大使不通聞問者四十年道光癸卯先大夫里居於書肆中遇先生鬚髮皓然各不相識互詢姓名乃相持大喜時先生遷雲南恩安縣知縣以年老乞休欲於郡城覓屋暫住先大夫遂留館之先生忠厚慈祥待人和霽年雖七旬而意興如少年余兄弟侍之每劇譚諧語至

丙夜不肯休工書善畫以意創爲簪畫其法濡紙令
稍濕蘸墨於簪任意揮灑雲煙滅沒有大小米之概
人爭寶之未幾先生之第三子簡侯宮贊能格來主
浙江鄉試事竣後遂迎歸京師侍養次年宮贊遷甘
肅鞏昌道余亦選金華縣訓導乃上書先生爲俳言
謂世弟年三十爲巡道某年三十一而爲訓導豈非
寸有所長耶先生得之大笑復書數百言皆諧謔語
先大夫見之亦爲絕倒先生嘗爲余言官大嵩時衙
署濱海魚鮮之屬不絕於庖一日忽聞門外人聲嘈

嘈然使往問之乃漁戶網得一大魚四足有尾獨無
角耳重數百觔衆議市無可賣欲殺之熬油先生命
扛之入署聚眷屬觀之時夫人方有娠見魚乃謂之
曰汝雖非龍然亦當是神物何不自慎而困於豫且
今則性命莫保奈何語未已此魚兩目汪然出涕漬
地斗許先生心大不忍亟出十金畀漁者而縱此魚
於海魚入海乍沉乍浮至中流震雷一聲風浪大作
遂振鬣去咸疑爲真龍矣未幾而簡侯生官至江蘇
布政使先生之孫名霽者近又以第二人及第今官

廣西學政子孫蒸蒸日上盛德之報也

先伯祖洛如公諱葵曾祖恬齋公長子也公幼而岐
疑髫歲能作擘窠書直隸制府方公觀承延入署令
書清慎勤三大字今節署堂上所懸九齡童子書之
榜是也顧屢試不第以

武英殿纂修四庫全書得直隸布政司經歷以終公
之長子爲枝巖伯諱明遠工詩著有玉照山房集少
時習扶鸞之術時召古詩人相爲唱和其是否莫能
明也最後來一仙與唱酬最久自承爲狐會伯祖母

張安人下堂而傷其足疾甚劇諸醫束手狐自贊能醫然需藥資銀若干許之乃先用敷藥繼用剪劑每日二次以承筐繫于梁上少頃藥卽在中而墜自下矣煎劑熱可炙手不知其藥從何處煑也病愈後取銀而去又不知需銀將何所用也枝巖伯每欲與之相見輒不可久之乃約於某酒肆中晤面屆期而往無所遇而歸歸後降壇書曰室內第幾座上長髯之老道士卽我也君何不相詣耶思之信然自是遂絕此事先大夫在都中所目擊者狐自言每月在

宮中輪當差使數日信乎

聖天子百靈呵護也

先大夫又言福建省城內九仙山有乩壇主之者亦一狐作詩文楚楚有致而大致在以醫術濟人服其藥者有驗有不驗曰吾能治病不能治命也至總督署中之狐則據居一樓稱爲仙樓可以問卜李鄴齋方伯自盡一案星使且至人往叩之則畫二紅頂於紙上莫解其故既總督汪公巡撫王公皆褫職乃悟道光之季制府劉公韻珂撤其樓狐大肆擾至劉

公歸乃已

海南查映山先生瑩以吏科給事中督貴州學政科
試苗疆取一土司之子入泮撤棘後土司率其子來
謁謝美如冠玉公有一侍者貌亦娟好土司子歸後
此人遽辭公去疑而訪之則兩美必合也公一笑置
之至次年鄉試揭曉土司子竟得解元公謂中丞曰
此人在上年我前取之入學筆下甚平何能作此等
文試傳訊之一到卽款伏係倩浙江湖州某舉人頂
替入場所作中丞大駭然以罪名重大頗思消弭之

察公顏色不懌不敢遽言擬越日再爲周旋公去後
適有他事須奏升炮發摺中丞聞之疑公以此事上
達已若不陳懼干譴責遂連夜繕疏人告次日詢公
所奏之件則並不因此也二公俱大悔恨疏

上得

旨照例正法兩人遂駢首死事越二十餘年公久歸
道山有湖州姚孝廉年二十餘文名籍甚曾試報罷
後留京與先大夫同客查小山比部有圻處比部卽
公之嗣子也孝廉爲人恂恂篤謹不妄交遊獨與朱

大夫善一日微疾握先大夫手曰吾將以後事累君
矣驚詢其故則歷舉前事蓋土司子控於地下孝廉
則某舉人之後身將往對質先大夫問何以不早爲
發覺則曰科場舞弊例應處斬本無可言學政摘發
弊竇亦是其職特以查公有疑其誘侍者一事心近
於私當有挾嫌之罪冥官以究竟事本因公故待查
公數盡之後始行提訊若公誠無此心則土司子亦
不能再有異說第某不幸前世因之橫死今世又因
之天死耳語訖痛哭次日遂卒此事比部本不知之

既詢公隨往貴州之老僕則信有此事而內中曲折不能如孝廉所述之詳噫孝廉既予之轉生矣何必又令之再死乎且前世以孝廉罹禍今世何爲又予以孝廉徒使姚氏門中寡妻弱子兢兢無告此則天理之不可解者也孝廉名某字某先大夫曾舉之則余忘之矣

長洲徐少鶴侍郎頌嘉慶乙丑榜眼姑丈季雅先生之兄也侍郎博學工古文爲姚姬傳先生入室弟子曾侍

上書房

宣宗登極以師傅恩隆隆驟遷方且大用乃於督安徽學政任內以疴疾遽卒

天子眷念舊學飾終之典極爲優渥當公初病時卽若有所見作紀夢詩十餘首鈔冥恍忽多不可解臨終自言前世爲福建林公子客茲以公子事牽累至此然所爲何事卒未明言也季雅姑丈有文述病中見冥王事甚詳余粗記其梗概如此嗟乎姚與徐皆以前生事天其天年然一則僅登賢書一則官至通

顯乃各追其前事而死天欲殺之則如勿生何必多
此一舉然亦可令人警懼今世勿作累來世之事可
也或曰世人第顧目前後日之累且勿顧況來世之
累乎悲夫

科場中世每豔稱鬼神事以彰果報余自道光戊子
科起至咸豐乙卯科止共鄉試十五次前後居矮屋
中計一百三十五日可謂久矣然鬼神之變幻不特
目未之見卽耳亦未之聞惟外舅聞藍樵先生言嘉
慶丁卯科鄉試頭場三藝脫藁已三鼓矣內通如廁

比還見燭臥於卷面已橫藝寸許不特卷不焦灼并油亦不溢出驚爲奇異是科遂中式容是鬼神之力至咸豐辛亥科鄉試同官陳星垞二子丙曾誦曾兄弟同掇高魁其文皆取法尤王於是都中盛傳星垞於元旦夢文昌神告以今年闈藝宜學西堂農山因此得雋初春圃相國以問貢荆山方伯緣星垞次子右曾館於其家也右曾馳書歸詢其父星垞持以告余并笑曰君今爲文昌矣蓋上一年都門寄來擬題若干內有可使有勇二句丙曾謂余此文自王農山

後無人能繼作者余因取少時所作是題文示之丙
曾嘆爲驚才絕艷傾倒萬狀余謂是餽釘之學壯夫
不爲丙曾乞其文去呈之星垞星垞謂此調不彈已
久鄉試可以必薦而不能保其必售初學偶學之亦
無不可於是丙曾弟兄皆學爲之而時時請業於余
余初尙爲改削久而益厭不復過問比入試而題係
必也射乎三句適可用尤王腔調弟兄遂皆中式並
無所爲文昌示夢也因知科場內所傳鬼神之事者
大率類此

丙曾兄弟既同捷於是浙省人士競揣摩聲調之學
書肆遂取農山西堂二公文彙重雕之爲尤王合刻
風行一時都中論文者以爲敗壞風氣龍編修元禧
尤惡之壬子會試龍適與分校之役搜得一文情濃
豔之卷示人曰此必陳氏兄弟也亟橫抹而黜之丙
曾顧爲清微淡遠之作又得中式比填榜龍見陳丙
曾名大駭取其卷讀之復大驚丙曾字子雁誦曾字
子清右曾字子銘同母兄弟皆少年高第談者有三
珠樹之目

張壁田軍門王良起於行伍目不識丁余初於蘭谿
軍次見之適有急牒至軍門拆閱點首攢眉者良久
乃舉付從兵令送文案處余詢牒中何事笑而不答
以爲祕不肯宣也越日又見持一札顛倒觀之大惑
不解旣乃知其本不知書特爲此以掩飾人之耳目
嘗與程印鵠太守換帖三代中有名蚤者頗以爲怪
繼復見其一帖則是早字矣因詢其文案某君答曰
渠不能指定一字第隨其口語而書之是以如此同
時有吳總戎再升者眇一目每戰必先登賊畏之呼

爲吳瞎子嘗延僧追薦先人僧請三代諱氏張目不
能答急召文案委員令撰一好名字與之聞者捧腹
此與侯景之托王偉撰七廟諱者何異善乎

國初之馬惟興也惟興以孫可望將來降官至福建
總兵順治之季嘗

賜諸將三代封典惟興久之不上撫臣問之愀然曰
某少時爲寇虜相從作賊今幸際會風雲實不知父
何名母何氏若私撰之不惟欺君亦自誣其先人矣
顏公以此語上聞但恩榮及身而已一時皆是其言

惜無人以是說告之軍門及吳總戎也

歸安凌厚堂莖道光辛卯舉人大挑選授金華教諭
與余同官性怪僻敢爲大言初到官卽於明倫堂自
署一聯云金匱萬千衷孔子曰孟子曰華袞百廿作
帝者師王者師見者無不吐舌論學直宗孔孟於宋
儒一概抹煞而尤惡朱子極口肆罵至謂朱子之父
名松與秦檜之檜字同班輩而朱子之名則與檜子
秦熈無異語極狂悖課人讀四子書止誦白文凡朱
註盡刪之嘗在金華府署中與其同鄉孫柳君孝廉

譚及考亭孫稍右之遂欲加以白刃以是人莫敢在
其前稱紫陽氏者議論縱橫自謂是奎宿降生俯視
一切於天下人無不鄙薄顧獨與先大夫善執子姓
禮惟謹又有閩人林拔皋先生年七十餘亦與之往
來會有人延之小飲座客互論金華人物凌拍案曰
郡城中只有一個半人其餘皆畜類耳一人爲先大
夫半人指林君座客驚稍稍引去凌傲然自得工古
文善奇門醫卜星相無所不能著有德輿子外集數
十萬言儼於古作家而於醫尤自負先大夫年七十

五猝中風疾以爲不救矣藥之數劑而愈縣署有幕友延之視疾按其脈曰無妨顧指一友曰君顏色甚晦當有病遂診之曰疾不可爲也百日內當疽發背死其人固康強無恙也至期果以疽歿於是人爭神之然內子聞淑人疾醫之竟死凌自恨無效亦發病者累月其相人也一望卽能決其貴賤壽夭何宮保桂清辛卯同年也撫浙時凌以敎職考驗一見懽然握手曰君昔相我當封疆今封疆矣請再視我異日何若對曰昔觀公相甚善今所留下部揖甚惡矣於

法當斬首何大怒揮之出越六年何果以失守罪伏
法此外相雖間有不中者然後來應驗者居多嘗謂
先大夫曰大劫將臨浙江無一片乾淨土吾所相人
多橫死者獨公祖孫父子相皆善不遭此劫當是公
厚德所致又嘗昌言年屆庚申京城有急兵入而杭
州亦破數俱前定莫可挽回至己未歲遂棄官歸時
余爲富陽教諭舟過城下不入貽書先大夫決別語
甚慘而猶以子孫無害之說慰先大夫焉次年庚申
夷人果入京師而杭城於二月間爲粵匪所陷皆如

其言自是余奔走兵間無從得其消息至乙丑歲在
盛澤遇其鄉人問之乃知其歸後居晟舍鎮杜門不
出湖州陷之月自卜賊匪當於某日到鎮若過已時
則無害屆日開門延友飲酒以待至已時賊果至執
之以歸僞王聞其名將以爲軍師大罵不肯命之跪
不肯有賊帥爲之緩頰曰一揖卽縱汝出矣亦不肯
僞王怒揮去殺之延頸受刃顏色不變而死噫厚堂
亦可謂非常人矣

厚堂最喜言區田法謂成湯七年之旱賴伊尹以此

治田故民不飢死繪圖著書逢人必勸顧無一人信
之者每深歎恨又自詡奇門遁法謂可以入水不濡
入火不焚云云一日方圍爐環坐厚堂又掀髯譚火
遁余戲舉鍤箸夾炭火燒其鬚厚堂驚起走衆客大
笑然相蔡二風有水厄當授以水遁法而二風果以
殉難投井死

蕭山蔡二風召南道光戊戌年進士雲南卽用知縣
改就教職銓杭州府教授丁憂服闋再選金華府教
授爲人忠厚長者言訥訥然如不出諸其口遇諸謔

際時出一語令人解頤性慎密意所不合亦不宣於言余嘗與商一事不答再問再不答余性卞遂罵之亦笑而不答也與余交逾十年情好甚摯余時綜理局事從未以一事相干終年閉門課徒而已發厚堂毀朱子二風與倪少尉時帆其非之余謂此厚堂代二君報怨耳兩人驚問故余曰君等不讀居蔡及反其旄倪之註乎衆爲哄堂二風第曰君是陳人故述陳言時府試責金華湯溪兩縣備旂鼓二明府不允謂無向例余諧之曰此真所謂金湯鞏固旂鼓相當

矣衆方粲然二風忽正色謂湯溪沈明府曰湯邑之
應辦鼓見於經書何可推諉沈請其說則徐曰君不
讀衛風擊鼓其鐃耶衆亦哄堂辛酉正月余以辦軍
糧臺寄眷口於金華二風來賀歲譚次忽戚然謂余
曰內子最信佛膜拜誦經者數十年矣今年元夕忽
夢觀音大士告之曰大劫已至上帝以爾家世代良
善一人不在劫中內子醒而甚喜我獨至今悵悵因
長歎曰若祇我家不罹劫則衆人之遭劫者多矣卽
幸而生全有何意味其居心忠厚如此四月賊至城

破二風投井殉難二子亦相繼死獨遺一孫在乃恍
然大士所告以一人不在刦者謂祇剩此一人也壬
申之夏其孫入泮矣來上海署謁余追念舊事爲之
愴然

粵匪之難浙江之官紳殉義者最多余之所不相識
者無從論定相識中則當爲李地山明府首屈一指
地山名福謙湖北之監利人咸豐戊午來攝金華縣
事會粵匪石達開由處州攻陷永康武義逕逼金華
一時佐貳諸君多托故引去官舍一空城中現任地

方官只太守及明府二人耳士民奔走不可禁止雖復力事城守然風聲鶴唳一夕數驚賊苟乘銳來攻實無抵禦之法余見人心搖動有不終日之勢慷慨謂明府曰以金郡之大若無一二死節之官不亦辱朝廷而羞當世之士哉明府持其衣帶間所寶藥示余曰子無慮我必死之因與謀所以死之處余曰聞古人有止水之說今大橋下水清而深當可爲葬身之地明府曰不然投水而或爲人所援救或被賊所鉤獲求死不死反受玷辱不如仰藥自盡之有把握

遂指永福寺內之塔曰我死必於更上一層所謂置身百尺也余笑曰君可謂得死所矣比賊退明府調攝仁和縣事余送其行曰腰間藥可棄之矣明府曰不然今賊雖竄去並非敗滅安見其不再來我仍當戒備耳庚申二月賊破杭州明府時在局中聞賊已陷城乃步出局門謂同行某公曰子當何如曰有老母在明府曰然各行其志可也遂登吳山之麓坐城隍神位前吞藥而死所謂置身百尺之上竟踐其言廟中道士取民家所寄棺盛之比城復改殮己半月

餘矣面色尙如平生嗚呼慷慨赴死從容就義明府二者殆兼之矣同時殉難爲余所識者有太倉葛小鐵主簿家達江漲分司無錫倪時帆景旂皆曾宦金華者也

吾鄉中殉賊難者秀水沈燭門馬少坡二廣文嘉興則江夢花明經皆余之舊友也族中則叔祖笠漁公希敬道光癸未進士官直隸深州知州賊至坐堂皇罵賊死最烈堂叔介卿公錫熙道光元年三品廕生官湖北荊州府同知護理糧道殉於武昌城中骸骨

均無從收掌弟文齋廣文其炳台門死之堂姪德宣
官江西縣尉則以戰死皆得

旨優卹此外宗族男女輩抗節死者甚多見於琴齋
兄所著文齋傳中要皆舍生取義者也近有大力者
其父兄實病歿乃捏爲被戕牒請

賜卹招搖市上鄉人藉藉唾罵

朝廷褒忠之典爲之不光吁使死者無知則已若其
有知何面目入昭忠祠也

乩仙多係鬼狐假托昔人論之詳矣然世人仍多信

之以余所聞則無錫唐雅亭明府受禍最酷雅亭以
縣尉起家累擢至浙之慈溪令爲人有幹材能飲酒
度曲上官俱喜之而顧極信扶鸞每事必咨而後行
在慈溪任時乩仙忽告以大禍且至宜亟去官雅亭
遽引疾上官留之不可未半載濱海鄉民入城滋事
後任官竟至罷斥於是益神之又詢以卜居之所乩
言天下且有事惟金華府之武義縣最吉遂徙往居
之置田營宅極園亭之勝飲酒按歌望者疑爲神仙
中人咸豐戊午二月賊至處州叩之曰無礙旣破永

康又叩之曰必無礙且云遷避則不免遂堅坐不出
比賊至全家被擄雅亭爲賊拷掠死甚慘賊退後余
偕李太守赴縣城辦撫卹至其家斷壁頽垣焦原荒
土屍骸狼籍爲之一歎噫此殆夙冤又異乎鬼狐之
假托矣

矜淹雅者喜旁搜博覽而於目前所讀之書每多忽
略如袁簡齋太史所記與諸翰林論孟子有韻之文
自師行糧食至飲食若流以下皆不能記憶或且杜
撰二語以足之衆疑其不類繡孟子書觀之乃大噱

乾隆時博學鴻詞不知增廣生員四字出在論語注中皆可笑之甚者先大父在太平府時嘗閱黃山谷尺牘中有損惠薌其語忘薌其爲何物時江右汪吳泉尙書方督學政大父舉以問之尙書謝不知適陳遠雯太守雲亦至尙書告以先大父所問太守譁曰陳君最好以僻典難人四庫書汗牛充棟安得盡能記憶遂不研究歸以語余輩時三弟昕年十二方讀禮記卒然應曰黍曰薌合梁曰薌其曲禮語也大父翼日謂太守曰禮記誠僻書也相對軒渠尙書聞之

笑曰兩榜眼可謂眼大如箕矣蓋汪陳皆以第二人及第者也同治癸亥史士良觀察上左爵帥書論事帥批其牘尾有曰該道喜用失事之人良以使功不如使過耳抑思古人棄婦妻非之喻乎觀察不知四字出處詢余及汪時甫太守皆不知徧繙類書不能得時章采南殿撰以憂歸舉問之亦不能答以爲真僻書矣嗣余至上海偶言之大兒德潛適閱裴松之三國志註諸葛武侯與張藩書曰棄婦不過門妻非不入園則此書亦未爲僻也惟鄉前輩言乾隆朝開

大科徵書至學學官遣門斗持文傳與薦者門斗問
諸君曰公等咸稱博洽亦知我門斗二字於何時昉
取何義名皆瞠莫對比至都訪之同徵者亦均無以
對迄今百有餘年矣計必有博學者能知之

徐少鶴侍郎少負博洽名作文喜用僻書難字嘉慶
甲子舉於鄉題爲謹權量四句文內所用之字讀者
多結舌不能下相傳是科內監試張古餘太守於第
二場夢神謂之曰此卷所用者乃爾雅注疏君其記
之旣醒自笑以爲監試官向不閱卷何有斯夢次日

方送薦卷入忽聞二主考相語曰卷中出比所用乃是山海經對比則杜撰矣當黜之太守聞之忽悟乃前白曰恐是爾雅註疏因述夢中所聞繙爾雅閱之信遂中式余曾以此事詢之其弟季雅姑丈而符亦奇矣哉

博雅宏通之彥余六十年來僅見三人一閩縣陳恭甫太史壽祺於書無所不覽著作等身余在福建時尙幼僅一拜見不能有所叩發第聞金匱孫文靖公侯官林文忠公欽佩之不已二公則余知其學問之

淵懿也一金谿戴簡恪公敦元余道光壬辰應京兆試公時爲刑部尙書以年家子上謁公謙抑殊甚有有若無實若虛之氣象余特搜僻典數則叩之公則曰年老記憶不真似在某書某卷第幾頁第幾行內其前則某語其後則某語試緝之則百不爽一盖公固十行俱下過目不忘者也余嘗問公天下書應俱讀盡矣公曰古今書籍浩如淵海人生歲月幾何安能讀得遍惟天下總此義理古人今人說來說去不過是此等話頭當世以爲獨得之奇者大率俱前世

人之唾餘耳公於刑部例案最熟無一事可以欺之
老胥猾吏見之束手故終身厯官不出刑部一爲會
稽屠彼園先生湘之先生與余同官者三年內行敦
篤善氣迎人廿四史十三經諸子百家探口而出問
之不能窮嘗爲袁簡齋先生駢體文注釋一典必窮
其源不肯舉眼前所有者以塞責余嘗借其本觀之
所引之典多出余所知之外者余謂先生恐簡翁當
日撰文時亦祇就目前之典用之未必若是之探天
根躡月窟誠恐先生所引之典並簡翁當日亦未必

知之先生曰固然然注書之法不能不如此余曰若天下後世皆欲如先生之釋書則所釋亦僅矣先生貧甚此書未及刊刻而歿庚辛之亂底本不知存亡矣先大夫嘗言南昌彭文勤相國乾隆時最稱爲博學相國爲考官

純皇帝以燈右觀書命題相國愕然不知出處大慙愧比覆命陳奏以學問淺簿不審詩題之所出敢昧死以請

上微哂曰朕是夜偶在燈右觀書卽事命題耳公叩

首趨出

上顧侍臣大笑曰今日難倒彭元瑞矣

同治丙寅十二月上海縣漕河涇趙姓有古樹數百年物也析爲薪樹杈中生大菌具人形者三一破於斧一爲析薪人竊去僅存一高尺許眉目耳鼻如寺中彌陀像丁卯二月莫家塘古墓有烏柏樹一株大十餘圍枯死久矣里人伐之穴中得紅芝一枝三歧上有佛像皆趺坐時余提調松滬厘局曾親見之秦景容先生諱裕伯大名人元至正進士官至奉議

大夫行臺侍御史延平府總管兼管內勸農事會世
亂避居上海題橋見志世目爲裕伯題橋張士誠據
姑蘇招之拒不往明太祖卽位命中書省檄起之先
生對使者曰食元祿二十餘年而背之是不忠也母
喪未終出而拜命是不孝也不忠不孝之人又焉用
之固辭不起居邑之東鄉長壽寺里歿卽葬於其地
太祖敕封爲上海縣城隍神丕著靈爽順治十年秋
海寇犯縣治總兵官王燦督戰辱師民聚而訴之王
怒訴之周巡撫誣民通賊周惑其說將俟雞鳴屠之

是夕神降官廨儼立階下周心動而止至夜半仍欲
屠之又見神直視搖首者數四懼而輟其事事載邑
人曹給諫一士所撰頌序民感神再生之惠二百年
來香火極盛同治丁卯余攝令南匯邑境開港鎮爲
先生子姓聚族所居之處曾以先生題橋事爲賦題
試諸生辛未調攝上海會先生裔孫彥華中翰暨其
族中生監十餘人呈請爲先生墓禁樵采余以先生
生爲義士歿作明神而邱壟摧殘侵佔不治是有司
之責也因首捐俸錢二百緡爲倡囑諸紳士量鼓分

操共得錢三千餘緡爲贖回墓地十九畝並建祠堂
於墓側俾其後世人守之王申之秋余謝事時工甫
及半至冬間彥華中翰來告歲事並云於先生墓道
前掘出石匣一具鐵條鋼之不敢啓視仍埋舊處余
謂此必當年所刻墓志也惜不開之俾銘幽之文一
顯於世而再埋之也中翰云當獲石匣時曾筮之以
著有文明之象其爲墓志無疑矣

南匯海濱廣斥鄉民圍圩作田收穫頗豐以近海故
螃蟹極多時出鬻稼國語所謂稻蟹不遺也其居民

每畜鴨以食螃蜞鴨旣肥而稻不害誠兩得其術也
此事余在南匯稔知之比宰青浦則去海較遠湖中
雖有螃蜞漁人捕以入市恆慮其少而鴨畜於湖千
百成羣闌入稻田往往肆食一空於是各鄉農民來
縣具呈請禁畜鴨時攝南匯令某君方以畜鴨食螃
蜞爲保稼善策稟請通行各處巡撫丁公抄稟行知
下縣余閱之不禁失笑因以青浦請禁之件申覆公
見之亦一笑而止蓋物土之宜固不可一概論之古
人迎貓祭虎今日虎詎可迎耶

好名之人能讓千乘之國苟非其人簞食豆羹見於
色此真孟子通達世故語也余嘗見慷慨之士揮斥
千金毫不吝惜於一二金出納或不免斷斷者事過
之後在己未嘗不失笑也五茸葉桐山爲河間通判
治餉宣府更代日積資餘三千金桐山悉置不問
主者遣一吏持至中途以成例請桐山曰不受羨卽
古例也命歸之晚居春申故里餽粥不繼一日梅雨
中童子張網失一大魚桐山爲呀歎其妻聞之曰三
千金卻之一魚能值幾何桐山亦撫掌大笑雖然居

今之世桐山可不謂賢乎

嘉興馬淡于明經汾嗜學工詩嘗謂余曰詩人境地亦各就其造詣爲之才力大者如清廟明堂有宗廟之美百官之富小者則如竹籬茅舍布置幽雅亦自可人吾才不高只可小以成小而已萬不可貪多務得譬之蘆簾竹屋中忽陳黃鐘大呂一器美則美矣其如不稱何先生累躋鄉試道光辛巳會開

恩榜時室中窘甚妻苦勸其不往先生不可典質簪珥而行出闔意得甚日盼捷音放榜日佇立門首會

同里沈蓮溪觀察中式報錄者誤入其家鄰人咸從之入衆口稱賀先生大喜登樓易衣冠命其妻爲之着靴顧而矜之曰何如語未畢樓下忽呼曰誤矣中舉者乃沈家也一哄而散先生靴猶未着竟其妻仰而誚之曰如何聞者無不捧腹先生歿後數年乃選景甯訓導

四川余紫松軍門步雲嘉慶初年以鄉勇從軍勦白蓮教匪力敵百夫所向無前由偏裨擢至大帥加太子少保銜圖形紫光閣征伐之事無役不從威名亞

於楊侯道光二十年西夷事起定海失陷軍門由福建調督甯波年已暮矣兼之兵將不習駐守招寶山者二年和戰之議未決而蛟門不守軍門伏失律之誅雖罪有應得而其情則可原焉軍門與家梅亭方伯在川楚軍營其事日久其初來甯波也致書方伯道契闊並及議和事方伯囑余代爲作答時余年少氣盛一揮而就書達侯官林文忠公見之矜賞甚至因之頗得聲譽迄今三十餘年不幸所料之事多有中者辛酉金華失守余詩文藁均付劫灰駢體文二

卷亦歸烏有此書乃門生姜梅生編修所錄存者甲子年寄以還余茲附存之

執別三巴歲星八易鱗羽並曠烏兔爭馳瞻望旌麾時形轡輓近聞移北門之鑰視東浙之師望重寰中威行海上想

聖人洪福元老壯猷揚烈武於簡青擒蘇文於鴨綠翹足可待屈指以期頃展芝楫式慰蕭念承示大軍雲集小醜勢窮夷目乞降廷臣議撫凱旋不日師撤有期既循覽之再三輒有疑於萬一不揣冒昧敬獻

芻蕘夫用兵固仁人所不忍言而禦侮亦王者有不容已恩不深不能懷遠人之志威不立不足攝狡寇之心故六月行師宣王薄伐三苗逆命虞帝徂征沿及漢唐之朝率有戎羗之役古來令主豈好窮兵良以蠻夷之情性感德少而畏威多是以中國之聲靈武備修斯文教治今者逆夷事勢居然猾虜機謀明曰通商陰圖襲邑其遊奕四處卽肄楚之狡謀其盤踞一隅卽以防之故智兵實怯於來戰故純以礮火作虛聲情究畏我久持故疊致書函爲疑陣撫厥使

爾已見端倪倘復信其詭詞必至墮其奸計未堅心
服益長天驕生四夷輕漢之心恃中國和戎之議損
威失體貽患將來糜餉勞師後憂方大就此一節慮
有三端從來大信不齊況在夷德無厭倘或陰圖深
入故爲陽乞緩師使臣方持玉節而臨贊普已鑄金
枷以待我將釋甲冠且張弧事起蒼皇禍成黑子雖
依漢與依天同誓不少差會之詞而受降與受敵無
殊終恐刼盟之變此其可慮者一也人面獸心非情
可喻蠅營狗苟惟利是圖縱令此日尚可羈縻難保

異時不生反覆費尋白馬諾責黃龍俺答貢明朝市不妨少掠元昊通宋賤貨可索貴酬喜則連艘而爲商怒則分舫而入盜此其可慮者二也揆其入犯之由實係禁煙而起驟通貿易難立章程卽嚴命之重申恐難遵乎令甲紛紜估舶乘鯨浪而明來雜沓漁舫駕鰲帆而暗引截之則彼時仍慮興戎縱之則前詔豈非反汗始猶私漏繼且公行機失一朝毒流四海此其可慮者三也我

國家金虎開圖銀麋拓地德威所被寰宇胥臣閣下

專闢大員中朝涵將假狄天使平南之節肅馬伏波
下瀨之軍草木亦識威名婦孺皆知姓氏掃清螟特
無待龜著况以邇者情形尤見勝謀在我狐跳梁而
尙短鼠鬥穴以將疲何必故作趑趄重煩擬議請上
防邊之策厯排築室之謀追原定海之亾實以重洋
之限鞭長莫及湯沃無從故遂鴟張得成鳩占然敗
之於崇明挫之於廈門殲之於姚江卻之於乍浦突
豕失勢鋌鹿已窮迄今餽運時增師徒日集諒軍食
則彼寡而我多計兵力則彼薄而我厚論氣勢則彼

驕矜而我忿怒度器械則彼損傲而我繕完機若建
旆事同沃雪先咷奚慮必克焉誣擒且勝於渡瀘功
更逾於橫海大羊入笠只用筆管魚鱉無橋何須靴
踢不疑何卜惟斷乃成固將却四座以勿喧決兩言
而不再某受

恩最重衰病不支際此倥偬未能展效莫上匡時之
策徒深憂國之心所望閣下刻玉燕山銘金麟海葱
珩赤舄賚方叔之元勛柅轡青圭祝召公之萬壽在
公固多偉績於某亦有榮施事業千秋起居萬福謹

承動靜無任主臣

余署青浦縣時江北委員來言揚州仙女廟鎮烈女
事心異之而未悉其詳也壬申冬在蘇州晤前江都
令甯波胡竹亭刺史璋詢之竹亭曰此吾後任事故
女之姓氏不能記憶然其事固彰彰矣先是鎮民某
聘烈女未娶而卒烈女聞信卽矢靡他父母屢勸不
從遂如其意俾過門守節某家業染固素封也烈女
入門後恪守姆訓家無閒言某之姪女年長未嫁與
染工王姓者通頗爲烈女覺時時規之女患之與王

謀並通之以緘其口而烈女冷面寒鐔不可以游詞
入則意必強而後可也一日者乘間令王先匿於房
俟其就臥犯之大呼不從王不能強女入助之拒益
力遂以被掩殺之而以靡死訃其家然血痕未滅也
父母控之官官爲杭州某君初驗時心頗疑之而未
能決比回署輾轉問其子受重賂說某竟以病死擬
定案人咸竄之越數日江甯省城隍廟卜者夢城隍
神升座有江都縣女鬼號訴聲冤神大怒簽差提人
俄頃囚至則赫然江都令也卜者驚醒次日舉以告

人人莫之信未幾江都縣報病故之文至於是喧傳
省中後任官復提全案研鞫事遂白女與王並擬斬
決而烈女請旌焉某君與余有年誼人亦恂恂長者
爲惡子所誤遂隕其生惜哉竹亭又言某卒未幾其
子亦暴疾死想地下無漏網也惟卜者云夢中詢神
姓名則曰是宋丞相文天祥

案烈女姓陳氏爲周二所聘二病歿過門守節二
之兄憐之使與己女名大虎子者同室處周之僕
婦徐與染工王玉春有奸并通大虎子爲烈女所
覺遂致烈女于死死後徐與大虎子反布腐香于
床褥間誣烈女以墮胎致隕賄作證之案遂定
觀夜夜聞鬼哭聲甚慘未幾王玉春忽自縊于烈

女靈前後數月江都令驟病死件作亦無故七孔
流血死經揚州守英君訊得實解省議抵臬司應
廉訪親鞠益悉其詳遂擬徐及大虎子均凌遲處
死其寃始白嗟乎既殺其身復汚其節在聞者均
爲髮指宜鬼神之不肯輕恕也天道昭昭真不爽
哉此案曾聞之廉訪友人後閱臬署故牘而信敬
附記之 光緒四
年春男德濬謹識